

圓瑛法彙

大勢至菩薩念佛圓通

講義

妙真敬題



大佛頂如來密因脩證了義諸菩薩萬行 首楞嚴經大勢至菩薩念佛圓通章講義

浙江寧波七塔報恩禪寺圓瑛宏悟講

今講此章。分爲二科。一題目。二正文。題目復分爲二。一經題。二章題。章依於經。應先講經題。題目是一經之總綱。全經乃一題之別義。題中總綱若明。經內別義自易了解。此題目中。具有通別與能所二對。先講通別一對。經之一字爲通題。通者同也。通於經藏。凡經藏一切經典。皆稱爲經。故爲通題。大佛頂等十九字是別題。別者差別。別在當部。以此經之名。與他經不同故。

次講能所一對。能爲能詮。所是所詮。詮乃詮顯發明之意。大佛頂等十九字。是所詮顯之法義。經字是能詮顯之文字。故別題中。一切妙理。無不依此通題之經。而顯發也。又此別題中所講。不出教理行果四法。如來密因是理法。修證了義是教法。諸菩薩萬行是行法。首楞嚴是果法。此教理行果四法。大乘發心修行。乃至成佛。所必經之程序。闕一不可。所謂信大教。解大理。修大行。證大果也。

大佛頂。大是讚歎之辭。佛頂爲表顯之義。譬如讚歎一位有道德有學問之人。必讚他是大道德家。是大學問家也。佛頂爲表顯之義。佛頂卽佛頭頂。青螺紺髮之中。肉髻頂相。形狀如春山吐日。紅光燦爛。此佛頂乃是非有非空。以其無相現相。佛出世時。九地菩薩爲佛乳母。尙不見其頂相。此爲非有。然又能從頂放光化佛。宣說神咒。妙用莫測。此爲非空。是則非有非空。不可思議。故謂之妙。是知此佛頂卽表顯妙之意義。今以大字讚歎。此教理行果四法。一一皆大。以妙字表顯此教理行果四法。一一皆妙。故以大佛頂三字冠頂。以讚表之也。

如來密因。是大因。爲成佛之因地。心諸佛悟此密因。依之修行而成就菩提也。又稱妙因。此微妙難思之因。心生佛同具。迷悟一如。諸佛證此而成佛。衆生迷此而輪迴。在聖不增。在凡不減。金剛經云。是法平等。無有高下。華嚴經云。心佛衆生。三無差別。此不可思議微妙之理。故稱妙因。

如來二字。是諸佛之通號。諸佛成道。皆稱如來。此依其所證。不生滅之理而立名。所謂乘如實道。來成正覺。又如來者。乃後佛如先佛之再來。以佛之出世度生。一一皆是示現八相成道。八相者。(一)下兜率降皇宮。(二)入胎。(三)住胎。(四)出胎。(五)出家。

(六)成道。(七)轉法輪。(八)般涅槃。今釋迦牟尼成佛。亦如過去迦葉佛成佛之來。卽未來彌勒佛成道。亦如我佛之來。故曰如來。小乘無住胎加降魔。密因者。密是祕密。因是因心。此心卽如來藏。妙真如性。無形無相。祕密難思之佛心。一切衆生。人人皆具此真如妙性。無奈迷不自知。因不知故謂之密。此真如妙性。爲諸佛成佛之因地心。本經云阿難。請求最初方便。如來首顯此心。故告之曰。汝今欲研無上菩提。必要眞實發明。自己本有不生不滅眞性。卽指密因。依此修行。可證菩提。此卽因字之義。又如來是果覺。密因是因心。以因心具足果覺。果覺不離因心。所謂因該果海。果徹因源。心卽是佛。佛卽是心。卽此密因之因心。而成如來之果覺。故云如來密因。密因之密字。是揀凡夫外道。二乘權教。四種人過。以其不達人人本具如來藏心。故佛告阿難云。一切衆生。從無始來。皆由不知常住眞心性淨明體。因衆生雖具常迷。故云密。而因字是揀狂慧人過。以狂慧人。智慧高超。一聞便悟。了知心卽是佛。但理雖頓悟。事必漸修。彼則偏執理性。不務事修。以爲我有天眞佛。更不假修持。一旦遇境逢緣。便乃隨流逐浪。毫無定力。故云狂慧。惟其所悟心。卽是佛。此乃理具本覺佛性。若無事修。終不成佛。故我佛三祇練行。百劫修因。道果方克圓成。故因字是對狂慧而說。此如來

密因一句。在經文之中。卽阿難所請妙奢摩他。悟圓理之文。從第一卷至第四卷半爲止。

修證了義。是大教。以佛爲大乘根機之人。所說大乘了義之教法。是爲大教也。又稱妙教。以佛教衆生。修習耳根圓通法門。以妙智照妙理。而妙理契妙智。故稱妙教。修爲修行。證爲證果。了義二字。乃顯明究竟之義。以所說之理最顯明。最徹底。究竟無餘。故爲了義。此了義教。是對不了義教而說。如來說法。方便利生。無非隨機說教。對病施藥。以衆生根機。利鈍不一。致如來說法。大小不同。有了義與不了義之分。今將佛說教法。略爲分別指明。便知其詳。如佛說世間法。持五戒。修十善。以此五戒十善之因。致感人天善道之果。是爲人天乘。不了義教法也。

如說出世間法。修苦集滅道。四諦之法。所謂知苦斷集。慕滅修道。故我佛於鹿野苑。爲憍陳如五比丘。三轉四諦。十二行法輪。三轉者。一示相轉。謂苦是逼迫性。集是招感性。道是可修性。滅是可證性。二勸修轉。謂此是苦汝當離。此是集汝當斷。此是道汝當修。此是滅汝當證。三作證轉。謂此是苦我已離。此是集我已斷。此是道我已修。此是滅我已證。時憍陳如。聞佛教示。最先解悟。卽獲果證。

修十二因緣法。十二因緣。有流轉門。與還滅門。二種之別。流轉門者。從無明緣行。行緣識。識緣名色。名色緣六入。六入緣觸。觸緣受。受緣愛。愛緣取。取緣有。有緣生。生緣老死。憂悲苦惱。此十二支。連環相生。起惑做業。隨業受報。故令衆生流轉生死。永無出離。還滅門者。諸修行人。眞智了知。生死根本。皆是無明。故以快刀斬亂麻之法。以智斷惑。滅除無明。此無明既滅。則行等十一支。緣生之法。一齊都滅。了脫界內分段生死。所謂復還眞性。滅除煩惱。故爲還滅門。唯此四諦十二因緣爲勝因。感證偏空涅槃之果。若對世間法。五戒十善相顯。此乃出世間了義教法也。

又於出世法中。復有了義與不了義之別。如說小乘四諦。十二因緣法。此還是不了義。須以大乘菩薩。所修六度四攝法。方爲了義。六度者。一布施度慳貪。二持戒度毀犯。三忍辱度瞋恨。四精進度懈怠。五禪定度散亂。六智慧度愚癡。修此六度之法。可度六種弊惡之心。如慳貪等六是也。四攝者。一布施。二愛語。三利行。四同事。以此四法。攝受衆生。菩薩修行。自他兩利。福慧雙修。方爲了義之教法也。

大乘菩薩修行法中。更有權教與實教之別。權教菩薩。雖修六度四攝。不達三輪體空。未能離相。有能施我相。有受施人相。有中間所施物相。歷歷宛然。此猶未能究竟清淨。

故。仍爲不了義法。惟實教菩薩。所修妙行。乃中道純真。了義中之了義法。既依了義妙修。自得了義妙證。了義之修。無修而修。了義之證。無證而證。卽如本經觀世音菩薩所修之耳根圓通法門是也。

今。特分別略明。無修而修者。菩薩所修耳根。反聞工夫。卽是修首楞嚴大定。此定乃天然本具之性定。不假修成。此卽無修也。而修者。因衆生從無始來。被無明妄想所誤。將此本具性定。重重障蔽。隱而不顯。若不假始覺妙智。做反聞自性工夫。則天然性定。不能證得。所謂修德無功。性德不顯。故須假修持之力。大定方顯。此所以無修而修也。

修卽無修者。菩薩於因地中。修習圓通。從妙耳門。一味深入。經云。欲取三摩提。實以聞中入。此謂之修。然所修反聞聞性之法。惟依本覺聞性妙理。起始覺反聞妙智。以此妙智。反照妙理。所謂依如如理。起如如智。將如如智。照如如理。理智一如。能所不二。修無修相可得。此卽修卽無修也。

無證而證者。菩薩修行。從根解結。得證圓通。此乃分證楞嚴大定。此定人人本具。個個圓成。故經云。性淨明心。本周法界。不從人得。何藉劬勞。肯綮修證。此卽無證也。而證者。此大定雖人人本有。祇因衆生爲妄想執著。所蓋覆故。莫能證得。若不加反聞照性之

功而性定實無由顯發。故經云。一根既返源。六根成解脫。塵垢應念銷。成圓明淨妙。此即無證而證也。

證即無證者。菩薩根結解後。證入圓通。故經云。成就涅槃心。觀世音爲最。其所證圓通。原是本有家珍。如宅中寶藏。衣裏明珠。迷時原無失。悟時豈有得哉。故經云。圓滿菩提。歸無所得。此乃證即無證也。夫此了義修證之教法。乃真俗圓融。空有無礙。中道了義中之了義修證也。此於經文中。所謂妙三摩而起圓修。從第四卷下半卷。阿難請修起。至第七卷。約有三卷爲止。

諸菩薩萬行。是大行。乃大乘實教菩薩所修之行。智慧雙運。自他兩利。運智上求佛道。以自利運悲下度衆生。以利他。是爲大行。又稱妙行。以其所修諸行。皆稱合實相理體。離相妙行。所謂終日度生。無生可度。經云。雖知諸佛國。及與衆生空。而常修淨土。教化諸衆生。是謂妙行也。

菩薩二字。在印度具足云。菩提薩埵。譯爲覺有情。有情即衆生之別稱。以一切衆生。皆有情識未盡。故以名焉。茲分三種解釋。一約自利釋。菩薩是已覺悟之有情。覺悟我空。法空。空空。三空眞理。我空者。菩薩以智照見。此五蘊身心。妄執之我。虛妄不實。覓我了

不可得。五蘊妄我既空。便證我空眞理。法空者。菩薩智照現前。了知所有萬象森羅。一切諸法。本來空寂。如空華夢境相似。了不可得。不獨滅後方空。實乃當體卽空。而證法空眞理。

空空者。菩薩修行。中道妙觀。不但照空我法二執。卽能空之空智亦空。所謂空空。方契眞體。清淨本然。古人云。百尺竿頭坐的人。雖然得法未爲眞。百尺竿頭重進步。十方刹土現全身。是謂空空。菩薩圓證三空眞理。故稱覺有情。

二約利他釋。大乘菩薩。根基大。智慧大。不獨自利。更能利他。興無緣大慈。運同體大悲。廣修諸善。饒益衆生。將自覺三空眞理。普覺法界一切有情。令人人咸登覺路。使個個共證圓通。故稱覺有情。三約兩利釋。菩薩稱中道理。修兩利行。智悲并運。福慧二嚴。念念上求。如來覺道。心心下化。法界有情。經云。四生九有。同登華藏玄門。入難三途。共入毗盧性海。故稱覺有情。

萬行者。菩薩修行六度。具足萬行。自度度他。念念熏修。無上道故。如本經五十五位實教菩薩。所修真菩提路。五十五位者。十信、十住、十行、十回向、四加行、十地、等覺是也。此諸菩薩。皆證圓通之後。帶果行因。歷位修證。因因果果。果果因因。安住楞嚴大定。任運

流入薩婆若海。圓滿菩提妙果。此於經文中。所謂妙禪那得圓證。從第七卷將末。至第八卷半。請經名爲止。

以上所說。妙奢摩他。三摩。禪那。此三種爲定之別名。綜合三別而成首楞嚴。定之總名。此卽阿難尊者。所請三定。而如來逐答三定。足證師資道合。問答相應。弘宣大教。饒益衆生。

首楞嚴是大果。乃十方諸佛。得成菩提。所證之聖果。至大無上。故稱大果。又稱妙定。此楞嚴大定。生佛同具。凡聖一如。動靜無乖。事理圓融。通因徹果。不可思議。妙矣哉。其定體乎。故稱妙定。

首楞嚴三字。涅槃經佛自釋云。一切事究竟堅固。所以者何。卽現前所有一切事相之法。山河大地。萬象森羅。依正二報。染淨諸法。以始覺妙智照察。照到究竟之處。豁然貫通。深知事依理起。全事卽理。相從性生。全相卽性。所有一切差別事相諸法。當下卽是平等理性。此性卽一真如心。實相妙理。堅固常住。本無生滅。本不動搖。故云一切事究竟堅固也。

首楞嚴爲一切定中之王三昧。具足圓定妙定二義。圓定者。以此定乃圓含萬有。而爲

定體。非獨制識心不動之定。乃圓含萬有。悉皆不動。所謂日月經天而不動。江河競注而不流。實所證之一乘寂滅場地。憨山大師云。海湛空澄。雪月光。此中凡聖絕行藏。金剛眼突空華落。大地都歸寂滅場。而此定圓周法界。含裹十方。故經云。五陰六入十二處。十八界。七大。皆如來藏。妙真如性。清淨本然。周徧法界。故稱圓定。

妙定者。妙不可思議之謂也。以此定是天然本具。不假修成。衆生迷時。非失似失。諸佛證時。無得爲得。經云。迷晦卽無明。發明便解脫。不變常隨緣。隨緣還不變。本無入定住。定出定之分。自非強制識心之定可比。如如不動。湛寂虛凝。幽微玄妙。人人具足。夫此楞嚴定。豈可得而思議耶。故經云。十方薄伽梵。一路涅槃門。誠哉言乎。以上別題已竟。下釋通題。經者梵語修多羅。此翻契經。契者合也。所謂上合十方諸佛。所說之理。下合六道衆生。應度之機。合理合機之教法。方稱爲經。更有貫攝常法四義之別。一貫者。貫穿所應知之理。如本經。則貫穿妙奢摩他。悟圓理。妙三摩。起圓修。妙禪那。得圓證。此三種所應知之理。貫穿一氣。令不散失。二攝者。攝受所應度之機。如本經云。攝受親因。度脫阿難。及此會中。性比丘尼。以及定性回心。二乘人等。應度之機。攝受無遺。今獲勝益。三常者。三世諸佛不能改易其說。如本經云。過去諸如來。斯門已成就等。四者。十界聖

凡皆應遵其軌。如本經云。現前諸菩薩。今各入圓明。未來修學人。當依如是法。以具此四義。故稱爲經。又經者徑也。乃修成佛道之途徑也。爲十方如來。一門超出之妙莊嚴路。夫此首楞嚴經。實爲諸佛之心宗。衆生之慧命。萬法之總持。禪門之要關。高深宏博。精妙幽微。誠宅中之寶藏。若反聞自性。則本有之光明顯發。自可照天地。耀古今。安住首楞大定。所謂那伽常在定。無有不定時也。今將通別經題講解已竟。

二章題

大勢至菩薩念佛圓通章者。亦分通別能所。章字一字是通題。通者同也。同於二十四聖故。上九字是別題。別者差別。別在當位故。此通別一對。又能詮是文字章句。所詮是上九字念佛道理。此能所一對。今釋別題。大勢至梵語摩訶鉢。此云大勢至。悲華經。寶藏佛言。由汝願取大千世界。今當字汝。爲大勢至。菩薩梵語。具足應云菩提薩埵。此翻覺有情。乃是已經覺悟之有情。非同不覺悟之有情也。

念佛者。此菩薩覺悟念佛。定能成佛也。然念佛復有三種。不可不辨。一者唯念自佛。悟得是心是佛。則與二十四聖圓通是同。此則該攝一切圓頓教門。禪宗直指法門。罄無不盡。二者唯念他佛。則與二十四聖圓通有別。以都攝六根爲能念。彌陀爲所念。淨念

相繼。便得往生。此則該攝彌陀藥師上生等經。以及蓮社法門。罄無不盡。三者自他俱念。則於二十四聖圓通。同而復別。先須大開圓解。了知心佛衆生。三無差別。自佛他佛。本來不二。乃托他佛。以顯自心。此則大解圓解處。與諸聖同。托他佛處。與諸聖異。故觀經所謂勝異方便也。今本章不假方便。自得心開者。以其方便最爲勝異。更不假餘方便也。今大勢至菩薩。先悟自心。卽佛。再念他佛。都攝六根。淨念相繼。托他佛以顯自心。今於此界。攝念佛人。歸於淨土也。

圓通者。圓是圓融不滯。統世間出世間。一切諸法。了知空有。圓融不滯故。通者通達無礙。於情無情。一切諸法。了知色心。通達無礙故。所以證圓通時。全相皆性。萬法唯心。卽所詮念佛之道理也。上釋九字別題已竟。

再釋通題章字。卽文字章句。自大勢至法王子起。至斯爲第一止。此篇屬能詮。解釋章題已竟。併上經題。是爲解釋題目已竟。

- 二正文分五 一陳白古佛授法 二詳喻感應道交 三合喻顯示深益
四述已自利利他 五結答所證圓通

大勢至法王子。與其同倫。五十二菩薩。卽從座起。頂禮佛足。而白佛言。

此根大圓通。乃都攝六根。非單修一根。若單修則與六根同。七大中。根大在識大前。今此菩薩。說在彌勒之後。爲對機故。如觀世音不預六根之列。而獨殿後者。中有三意。一知佛密意。於前教令悟圓入一科中。已密示耳根爲最優。二知此方衆生耳根最利。易於修證。如文殊云。此方眞教體。清淨在音聞。三知若對多聞之阿難。一向慣用耳根。但令不順流聞聲。而逆流照性。便可就路還家。順流聞聲。卽是結縛之元。乃爲生死本。逆流照性。卽是解脫之要。可入涅槃門。故觀音殿後。敘述解結修證。廣談利生大用。以啓阿難羨慕之心。

大勢至亦知佛之密意。若對此方機宜。修證楞嚴大定。固是耳根爲最。若論曾被三根橫超生死。惟有念佛法門。最簡易。最圓頓。堪稱第一。故說在識大之後。

大勢至觀經云。以智慧光。普照一切。令離三塗。得無上力。是故名大勢至。思益經云。我投足處。震動大千。及魔宮殿。故名大勢至。又名得大勢。以能成辦一切。所應作事。故得

大勢力也。悲華經云。往昔因中。彌陀作輪王時。觀音爲長子。勢至爲次子。今在極樂。居彌陀左右。輔弼佛化。候補作佛。

阿彌陀名無量壽。乃有量之無量。亦有涅槃。彌陀涅槃之後。正法住世。亦復無量。正法於上半夜滅盡。下半夜觀世音菩薩成佛。名普光功德山王如來。佛壽與正法亦皆無量。正法住世時。大勢至菩薩教化衆生。候補作佛。至正法於上半夜滅。大勢至菩薩於下半夜成佛。名善住功德寶王如來。

法王子是菩薩別稱。法王指佛。佛爲法王。於法自在。法王子能發四種心。一發廣大心。誓度無邊衆生。於十方世界。攝念佛人。歸於淨土。二發第一心。誓成無上佛道。雖已分證三德。仍求究竟二嚴。三發常時心。輔助彌陀觀音。久經劫數。不生厭倦。四發不顛倒心。歷劫度生。不著度生之相。無度而度。度卽無度。能荷擔如來重擔。能承紹法王家業。爲法王眞子。故稱法王子。

與其同倫。五十二菩薩。與者共也。倫者類也。要分自行化他二類。一自行同以念佛心。得入無生忍。雖同修念佛法門。功行淺深不等。或有住乾慧地者。或有住十信。十住。十行。十回向。十地等覺者。合計五十二位。故曰五十二菩薩。非同定數也。二化他。同以念

佛法門。教化衆生。今於此界攝念佛人。歸於淨土。功行淺深。所化之衆。亦有五十二位差別。

菩薩解見在前。即從本座而起。頂禮佛之雙足者。以至尊之首。頂禮我佛至卑之足。以表至敬。而白佛言者。此是請法之儀。乃結集經家所敘。

我憶往昔。恆河沙劫。有佛出世。名無量光。十二如來。相繼

一劫。其最後佛。名超日月光。彼佛教我念佛三昧。

菩薩自稱曰我。乃是菩薩假我。及法身真我。不妨隨順世人。同稱爲我。非同凡夫妄執之我。凡夫妄執。四大妄身。以爲實我。不了諸法。本來無我。我執既起。貪、瞋、癡、無不從此而生。或貪財爲我受用。或貪色爲我娛樂。或貪名爲我榮耀。或貪食爲我滋養。或貪睡爲我安息。是我所貪之財色名食睡。若爲他人之所妨礙。以及剝奪。則瞋怒之心。勃然而起。此因貪起。瞋即愚癡。是知我執爲諸惡根本。身心因此不得安樂。世界由此不得和平。

又非同外道。妄計之我。外道有二十五諦。最初爲冥諦。冥諦生覺大。覺大生我心。我心

生五微。五微生五大。五大生十一根。最後曰神我。計有神我爲萬能。此屬邪知邪見。菩薩已證我空故。非妄執與邪計。凡外二種我也。

我憶往昔恆河沙劫。我字已如上釋。憶者憶念。明記不忘也。過去稱爲往昔。恆河亦云。殑伽河。此云天堂來。狀其來處之高。此河在印度雪山之頂。無熱惱池流出。無熱惱是龍王名。此池以龍爲名。池有四口。流出四河。東銀牛口。流出殑伽河。卽恆河。河闊四十里。河底銀沙。沙細如麪。南金象口。流出信度河。此云驗河。河底金沙。西琉璃馬口。流出縛芻河。此云青河。河底琉璃沙。北玻瓈獅子口。流出徙多河。此云冷河。河底玻瓈沙。中國黃河源。佛所住祇園相近恆河。凡言數目之多。常取河沙爲喻。此言恆河沙劫。以顯經時之久也。劫具云劫波。此云長時分。

有佛出世名無量光者。於時有佛出現於世間。佛梵語具云佛陀。此言覺者。乃大覺悟之人。具本覺之妙理。發始覺之妙智。證究竟覺之妙果。方名爲佛。在因地之中。亦是人道。一衆生。修成爲佛。本覺者。卽衆生本有之覺性。人人本具。個個不無。此性卽衆生六根之中。不生不滅之眞性。亦卽眞如妙理。隨衆生之染緣。其體不變。前云縱汝形銷。命光遷謝。此性云何爲汝銷滅。隨緣不變。故謂之妙。本覺妙理。具雖人之本具。多皆迷而